

16 AUG 2001

Agong-Indonesia

AGONG UTUS TAHNIAH KEPADA INDONESIA SEMPERNA HARI KEMERDEKAAN KE-56

KUALA LUMPUR, 17 Ogos (Bernama) -- Yang di-Pertuan Agong Sultan Salahuddin Abdul Aziz Shah hari ini menghantar perutusan tahniah kepada Presiden Indonesia Megawati Sukarnoputri sempena ulangtahun kemerdekaan ke-56 republik itu hari ini.

Dalam perutusan yang dikeluarkan oleh Wisma Putra itu, Seri Paduka mengucapkan kesyukuran dan gembira atas hubungan akrab dan jalinan kerjasama yang erat antara Malaysia dan Indonesia.

"Semoga hubungan berdasarkan kepada semangat persaudaraan dan kejiranan terus dipertingkatkan demi kepentingan dan keharmonian kedua-dua negara pada masa akan datang," titah baginda.

Perdana Menteri Datuk Seri Dr Mahathir Mohamad dalam perutusan kepada Megawati berharap Indonesia akan mencapai kestabilan dan kemakmuran pada tahun-tahun akan datang di bawah kepimpinan Megawati.

Megawati dipilih sebagai presiden kelima republik itu oleh Majlis Permesyuaratan Rakyat (MPR), 23 Julai lepas.

Dr Mahathir juga bersyukur kerana kedua-dua negara sentiasa menikmati hubungan dua hala yang mesra serta akrab.

Beliau yakin persahabatan yang sedia terjalin antara rakyat kedua-dua negara dapat dikekalkan dan bertambah mantap.

Menteri Luar Datuk Seri Syed Hamid Albar turut menghantar perutusan kepada rakan sejawatannya, Dr Nur Hassan Wirajuda, antara muka baru dalam Kabinet Indonesia yang diumumkan Megawati pada 9 Ogos lepas.

Syed Hamid berkata beliau yakin keakraban hubungan silaturrahim berdasarkan persefahaman dan persaudaraan akan terus kukuh demi kesejahteraan kedua-dua negara dan rantau ini.

-- BERNAMA

AT AZZ LAT